

VI

34

RÖPL.
148

~~1533~~

1532

Die zehntung vñ war-
hafte anzaygüg/wie die streif
fend rott des Türckischen Tyrannen vñ d ver-
folger des Chrißlichen pläts / auf hilff
vñ gnad des almechtigen Gots/
durch die vnsern erlegt vñ
vmbgebracht / Am. 18.
Septembris ge-
schehen.



M. D. XXXII.

427

M II 592

Am Zehenden Septem:

bris inn Wien.

Dum Zersten/ist Wagisch Paul mit hundert vnd fünffzig pferden oder Hussarn / am Sechstenn Septembris von Wien aufgeritten/ vnd sich inn ein hegen bey der Statt Paden geschlagenn/ da ist ein Straiff her geritten/ bis in Dreyhundert Türckē/ da hat Wagisch Paul/ auß dē holtz gesprenget/ vnd auff sein sprach geschrien/ Her/ Her/ Wagisch Paul/ da haben die Türcken die flucht geben/ hatt sie alle Wagisch Paul ereyht/ vnd bis in zweyhundert vnd fünffzig pferd erleget/ hatt den Sibenenden Septembris/ hier ein gen Wien geführt ain vnd zwainzig lebendig/ vnd syben todten köpff/ seind Drey Weyda oder Wascha darunder/ haben pracht Drey vnd zweyungzig pferd/ die andern Kopf seind entlauffen/ vnd erschlagen/ aber vil güttes bey inen eroberet. Also ligen die Türcken hie/ wolten etliche sie vmb Dreyhundert Ducaten lesen/ Ist ein Klamer Knabe vnder inen/ hat ein hüt auff/ wil man Achzig Ducaten vmb den hüt geben/ Also hat sich die sach mit Gottes hilff zügetragen.

Item weiter hatt man sich bey den gefangenn Türcken erkundiget/ das bis inn Sechstausent im wald ligen hinter Paden/ beim Heyligen Creütze/ im Kloster/ Also seind am Achteren Septembris/ bis in

bis in Dreyhundert wolgerüstet pferd hinauf/ vñ Wagisch Paul mit Sibenhundert Hussarn / vñ vñ Klein feulin knecht/ auch fast vil Spanier mit halben bagken/ haben sie beleget/ das sie nitt mer davon künden kommen/ Haben im etlich falckonet geschicket/ seind schon die nacht hinauf geführt worden. Vnd am Zehenden Septembris frü vortags/ ist man willens die anzügreiffenn/ Damit Gott mit vnns.

Item der Türck hat vnser Kaysers Pottschaft abgefertiget/ vnd sie mit Dreyhundert mannen lassen belaitē/ bis gen Schwechat. Bey der nacht vñ die aylff vr/ seind sie hinumb geritten mit zweyungzig pferden/ die der Pottschaft zügehört haben / Danach ist sie am andern tage auff einem Gotsch/ zü dem Kaysen gefaren/ Niemandts waist/ was er der Pottschaft beuolhen hat/ Kaysen vnd Königlichē Mayestet/ sol auf sechzehnen ob sibenzehenden Septembris gen Wien zoge sein/ man sagt wie bis in die Viertausent vñ fünfhundert Reisigē pferd/ vñ etlich feulin Teutscher knecht/ sampt etlichem feldt geschütz/ dem Türcken nach eylen auff Steyr marck zü/ acht man er ziehe ab/ das dann nicht güt were/ solt er sich nicht züvor mit vns schlagen.

Man schreibt von Venedigern/ wie das Herr Andrea Dorio sol des Türcken Armada geschlagē haben/ Got gebe das es war sey.

A ij Andere

Andere Newezeyttung.

Der Türckisch Kayser/ soll aigner person/ vnd mit gewaltigem hauffen abgezogen seyn / vnnnd damit er dester sycherer hinauff kām/ hat er eyn hauffen bis in Sechzehen tausent starck / auff Kernten / vnd Steyrmarck strayffen lassen/ Darauff Graff Wolff von Montfurt mit fünffzehen hundert Pferdē/ Margraff Joachim d' Jung/ sampt dem obersten des Fußvolcks/ Herz Conradē von Bemelberg/ mit Vier Fendlin/ Graff Ludwig vō Latren vber Königlicher Mayestat hülff oberster/ sampt Neün Fänlein/ vnd den Spaniern zu Wien gelegen/ auch den fünff Fänlein/ so zu der Newstatt gewesen/ den Dreyzehenden tag Septembri/ anzogen / deren strayff abbruch zūthon.

Vnnnd am Vierzehenden Sept. Ist Schertlin oberster Luturant/ mit Zway vñ zwaynzig Fendlin Landsknecht / von der Keychs hülff anzogen/ vnd nach im Pfalzgraff Friderich mit allem Keyfigen zeug/ bis in Zway tausent oder darob/ starck/ Vñ als man auß vil/ vnd allerlay kundtschafft vernommen/ das die Türcken strayff/ vnserz von der Newstat auß anderhalb meyl wegs/ in ein gepürg ligen/ vnd müd / mit Chrusten vnd raubschwert beladen sein sollē/ haben sich dye andern hauffen inn zway thail getrent / vnd gethailt/ sich neben inen /
an dem

an dem gepürg zūfelde geschlagen / vnnnd auff den fünffzehenden obgemelts Monats / dye strayffe mit drey hauffen angewent/ aber ihnen nichts abbrechen mügē/ sonder bis auff Vier hundred Spanisch Schützen zū grund gangen.

Auff den Sibenzehende Sep. ist die strayff außprochen/ vñ neben der vnsern geläget/ Lewerstoiff genant/ auff ain meyl/ in ain thal vñ in ain Marckt Potenstein genant/ geschlagen/ das die vnsern von stund an durch kundtschafft vernommen. Auff solichs Herzog Fridrich zū nachts vñ neün vr / nach Hauptman Schertlin gesandt/ im alle kundtschafft die dann fast nöttig vñ eylendts geschinen / lesen lassen/ Haben sy bayd ainig vnd alleyn sich mit ainander beratschlagt/ vnd diereil sye die kundtschafft eylend vnnnd fast nöttig sein befunden/ beschlossen/ das Schertlin on verzug den nechsten mit etlichen kundtschafftern/ vñ dem verlorren hauffen/ Zehen Fenlein anzogen/ vnd haben sine dye Pauren vber ain gepürg vnd langen wald geführt/ von danen er selb dritt hingeschlichen / der Türcken läger zū besehē/ hat in von vil der feür / Dreyssig tausent od mehr da ligen bedacht/ Als er aber wider zū dem hauffen geschlichē/ seynd Drey Türcken/ so Scart gehalten / auß inen gestossen/ deren er aynen gefangen / vñ in aller gelegenheit befragē lassen / der hat angezeigt / das sy die Türcken Zehē tausent starcke da legē/ wissen nit wo hinauß/ sy weren hinden vñ fornen vmblegt/ Klager auch vñ zeigt an/ Ir Keyser het
A iij ser het

ser het sy schendtlich verfürct / inen angezeygt / Dise land hetten sich alle an ihn ergeben / so sehe er wol / das sy do alle sterben müsten / Dye anderen zwent feind in der Türcken läger entritten / vnd eyn Lermen mit ainem grossen geschray gemacht.

Darauff Schertlin mit seinem heüßlein auff eyn bühel hinzü geruckt / sein schlacht ordnung eylends beschlossen / Aber die Türcken mit synem grossen hauffen / vnd grawsamen schreyen gegen inen her auß / auch auff ainem bühel / so nahent / das sy einander mit ainem Handtroze / erlangen hetten mügen haltend / Haben sy von zway an / bis der tag angefallen / vor ainander gehalten / Ist ain grosser nebel gelegen / der sy lang verhindert / Darauff Schertlin züstundt Herzog Friderich bottschafft gethan / wie er mit im verlassen hat / Er hab den Bern gefunden / sein Gnad müg sich auch versehē / er wölle in mit Gottes hilff stächen / vnd sein Gnad soll sich mit iren Keyttern vnd fūßuolck versehen / vnd auf den plag dem geschütze zū ziehen / dan so die Türcke von ime abzugē / müsten sye eben das selbig thal hinauf / da des Keychs läger were.

Als bald nun dise Post von ime hinweg kame / auch sein ordnung beschlossen / hat er von den Drey heüßlein Hundert vnd fūßffzig Schützen genommen / die mit grossen trost / gegen den feynnden / den selben eylends nach zū ruckē / hingeschickt / also hat dises klain Schützen heüßlein / den gewaltigē Türckischen hauffen / allein mit Gottes hilff / vnd wunderbarer

derbarer stercke) angriffen / ohne auch ab dem bühel bis neben den Marckt vber ein wasser getrieben / Da haben sich die Türcken wider zūsamengethon / vnd die Schützen wider hinder sich getrybē / Als bald aber er der Hauptman solliches vernam / hatt er eylends an sich Vier hundert Schützen / so neben der ordnung angehenckt waren / gehencket / vnd sampt seinem gesinde / Trabantzen / Schreyber etc. sy wider angegriffen / vnd zum andern mal in die flucht geschossen / vnd geschlagen. Also haben sy sye durch das thal hinumb / wol anderthalb meyl wegs / bis auff die weyte / wie vnser geschütz / Kaysig / vnd fūßuolck gestanden / inn die hend hinein geiagt / vnd inen ehe sy auf dem thale kommen / mer als Vier tausent setel gelert / vnd was hinauf ist kommen / haben die vnsern / deren sy in die hend geratten / inn ain holz getryben / vil erlegt / die anderē von pferden gebracht / man eylet inen nach / sy seind müde / mügen nit hinweg / wirdt ihr kainer darvon kommen / Es ligen alle greben vnd Weingärten vol / Vnd inn Summa vnser thayls ist nit ain man vnt kommen / aber doch etlich vil von den Säblen wund geschlagen.

Faint, mostly illegible text in a historical script, likely Latin or Hungarian, arranged in several lines across the page.



